

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১২২/২০১৭

ঢাকা, মঙ্গলবার ২০ জুন ২০১৭, ৬ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। জাতীয় অনলাইন নীতিমালা-২০১৭ এর খসড়া মন্ত্রিসভায় অনুমোদন
- ২। মরক্কোকে বিনিয়োগের আহ্বান প্রধানমন্ত্রীর
- ৩। রাজনৈতিক নেতাদের সঙ্গে প্রধানমন্ত্রীর ইফতার
- ৪। কয়েক দিনের মধ্যেই আমদানি করা ৫২ হাজার মেট্রিক টন চাল দেশে পৌঁছাবে : পরিকল্পনামন্ত্রী
- ৫। চাল আমদানিতে শূন্য মার্জিনে ব্যাংকে এলসি খোলা যাবে : বাংলাদেশ ব্যাংকের প্রজ্ঞাপন
- ৬। মুক্তিযোদ্ধাদের জন্য তৈরি হবে ৮ হাজার ফ্ল্যাট : মুক্তিযুদ্ধ বিষয়ক মন্ত্রী
- ৭। হালাল শিল্পের বিকাশ ঘটিয়ে বৈদেশিক মুদ্রা আয় সম্ভব : শিল্পমন্ত্রী
- ৮। নারী শ্রমিকের মজুরি নির্ধারণে চিন্তা-ভাবনা প্রয়োজন : কৃষিমন্ত্রী
- ৯। পাহাড় কাটার বিরুদ্ধে ব্যবস্থা নেওয়া হচ্ছে : সংসদে পরিবেশমন্ত্রী
- ১০। গত ৬ বছরে ৩১ লাখ বিদেশি বাংলাদেশ ভ্রমণ করেছেন : বিমান ও পর্যটনমন্ত্রী
- ১১। বিশিষ্ট কবি ও সাহিত্যিক বেগম সুফিয়া কামালের ১০৭তম জন্মদিন আজ

১। **জাতীয় অনলাইন নীতিমালা-২০১৭ এর খসড়া মন্ত্রিসভায় অনুমোদন**

অন্যান্য গণমাধ্যমের মতো অনলাইন গণমাধ্যমগুলোকে সম্প্রচার কমিশনের কাছ থেকে নিবন্ধন নেওয়ার বিধান রেখে ‘জাতীয় অনলাইন নীতিমালা-২০১৭’ এর খসড়া অনুমোদন দিয়েছে মন্ত্রিসভা। গতকাল ১৯ জুন সোমবার সংসদ সচিবালয়ে প্রধানমন্ত্রী শেখ হাসিনার সভাপতিত্বে মন্ত্রিসভার নিয়মিত বৈঠকে এ অনুমোদন দেওয়া হয়। বৈঠক শেষে মন্ত্রিপরিষদ সচিব মোহাম্মদ শফিউল আলম বলেন, ‘জাতীয় সম্প্রচার নীতিমালা-২০১৪’ অনুযায়ী সব সম্প্রচার মাধ্যমকে সম্প্রচার কমিশনের কাছ থেকে লাইসেন্স নিতে হবে। কমিশন সম্প্রচার মাধ্যমগুলোর মনিটরিংয়ের কাজও করবে।

লাইসেন্স ছাড়া কৃষি কাজের জন্য নলকূপ স্থাপনে শাস্তি বাড়িয়ে ‘কৃষি কাজে ভূগর্ভস্থ পানি ব্যবস্থাপনা আইন-২০১৭’ এর খসড়া চূড়ান্ত অনুমোদন দিয়েছে মন্ত্রিসভা।

আখাচাষীদের কাছ থেকে সংগ্রহ করা রাস্তাঘাট উন্নয়ন উপকরের পরিমাণ বাড়িয়ে ‘বাংলাদেশ চিনি (রাস্তাঘাট উন্নয়ন উপকর) আইন-২০১৭’ এর খসড়ার নীতিগত অনুমোদন দিয়েছে মন্ত্রিসভা।

‘অধিগ্রহণকৃত বেসরকারি প্রাথমিক বিদ্যালয়ের শিক্ষক (চাকরির শর্তাদি নির্ধারণ) বিধিমালা-২০১৩’ সংশোধনের প্রস্তাব অনুমোদন দিয়েছে মন্ত্রিসভা।

বাহরাইন ও কুয়েতের সঙ্গে দ্বৈতকর পরিহার সংক্রান্ত চুক্তির খসড়া অনুসমর্থনের প্রস্তাব মন্ত্রিসভা অনুমোদন দিয়েছে বলে জানিয়েছেন মন্ত্রি পরিষদ সচিব।

মন্ত্রিসভা বৈঠকের শুরুতে ওয়ার্ল্ড সামিট অন ইনফরমেশন সোসাইটি (ডব্লিউএসআইএস) পুরস্কার-২০১৭ প্রধানমন্ত্রী শেখ হাসিনার কাছে হস্তান্তর করা হয়েছে।

এছাড়া অতিবৃষ্টিতে দেশের বিভিন্ন স্থানে পাহাড় ধসে দেড় শতাধিক মানুষের প্রাণহানিতে শোক প্রস্তাব গ্রহণ করেছে মন্ত্রিসভা। সূত্র-সমকাল (পৃ.২,ক.৩), জনকণ্ঠ (পৃ.১,ক.১), এশিয়ান এজ (পৃ.১,ক.৪), অবজারভার (পৃ.১,ক.১)।

২। **মরক্কোকে বিনিয়োগের আহ্বান প্রধানমন্ত্রীর**

প্রধানমন্ত্রী শেখ হাসিনা দু’দেশের পারস্পরিক স্বার্থে বাংলাদেশের অর্থনৈতিক অঞ্চলগুলোতে মরক্কোর বিনিয়োগ আহ্বান করেছেন। তিনি বলেন, আমরা শিল্পায়ন ও কর্মসংস্থানের জন্য সারাদেশে ১শ’ অর্থনৈতিক অঞ্চল গড়ে তুলছি। মরক্কো এই অর্থনৈতিক অঞ্চলগুলোতে বিনিয়োগ করতে পারে। এতে উভয় দেশ লাভবান হবে। গতকাল ১৯ জুন সোমবার প্রধানমন্ত্রীর সঙ্গে তাঁর জাতীয় সংসদ ভবন কার্যালয়ে বাংলাদেশে মরক্কোর নবনিযুক্ত রাষ্ট্রদূত মজিদ হালিম সৌজন্য সাক্ষাৎ করতে গেলে প্রধানমন্ত্রী শেখ হাসিনা এ আহ্বান জানান। সূত্র-সংবাদ (শেষ পৃ.,ক.১), জনকণ্ঠ (পৃ.১,ক.৮), ডেইলি সান (পৃ.২,ক.২), এশিয়ান এজ (পৃ.১,ক.৩)।

৩। **রাজনৈতিক নেতাদের সঙ্গে প্রধানমন্ত্রীর ইফতার**

প্রধানমন্ত্রী শেখ হাসিনা তাঁর সরকারি বাসভবন গণভবনে গতকাল ১৯ জুন সোমবার বিভিন্ন রাজনৈতিক দলের নেতাদের সম্মানে ইফতার মাহফিলের আয়োজন করেন। অনুষ্ঠানে প্রধানমন্ত্রী অতিথিদের সঙ্গে শুভেচ্ছা বিনিময় করেন এবং তাঁদের কুশল সম্পর্কে খোঁজখবর নেন। ইফতারের আগে বিশেষ মোনাজাতে দেশ ও জাতির অব্যাহত শান্তি, অগ্রগতি ও সমৃদ্ধি কামনা করা হয়। সূত্র-প্রথম আলো (পৃ.২,ক.৫), জনকণ্ঠ (পৃ.১,ক.৩), ডেইলি সান (পৃ.২,ক.১), এশিয়ান এজ (শেষ পৃ.,ক.৮)।

৪। **কয়েক দিনের মধ্যেই আমদানি করা ৫২ হাজার মেট্রিক টন চাল দেশে পৌঁছাবে : পরিকল্পনামন্ত্রী**

চালের বাজারের ‘অস্বাভাবিক পরিস্থিতি’ মোকাবেলায় আগামী কয়েকদিনের মধ্যেই ৫২ হাজার মেট্রিকটন আমদানি করা চাল বাংলাদেশে পৌঁছাবে বলে জানিয়েছেন পরিকল্পনামন্ত্রী আ হ ম মুস্তফা কামাল। তিনি বলেছেন, দেশে চালের মজুতে কোন সংকট নাই। হাওড়ের আগাম বন্যা, বিতরণ ব্যবস্থার ত্রুটি ও অসাপ্ত ব্যবসায়ীদের কারণে চালের দাম বেড়ে গেছে। এ অবস্থা বেশিদিন থাকবে না। সরকারিভাবে আরও চাল আমদানি করা হবে। পাশাপাশি চাল আমদানির ক্ষেত্রে সব ধরনের শুল্ক তুলে নেয়ার বিষয়টিও শীঘ্রই কার্যকর হবে। ফলে চালের দাম কমে যাবে।

গতকাল ১৯ জুন সোমবার পরিকল্পনা মন্ত্রণালয়ের বাজেট বিষয়ক মিট দ্য প্রেস অনুষ্ঠানে মন্ত্রী এসব কথা বলেন। সূত্র- জনকণ্ঠ (পৃ.২,ক.৪), সমকাল (পৃ.১২,ক.৫), ইন্ডিপেন্ডেন্ট (পৃ.১,ক.১), ডেইলি সান বিজনেস পাতা (পৃ.১,ক.৬)।

৫। **চাল আমদানিতে শূন্য মার্জিনে ব্যাংকে এলসি খোলা যাবে : বাংলাদেশ ব্যাংকের প্রজ্ঞাপন**

চাল আমদানিতে এলসি মার্জিনের ক্ষেত্রে কিছুটা শিথিলতা দেখাতে ব্যাংকগুলোকে নির্দেশ দিয়েছে বাংলাদেশ ব্যাংক। এর ফলে এখন থেকে ব্যাংকগুলো শূন্য মার্জিনে চাল আমদানির ক্ষেত্রে এলসি খুলে দিতে পারবে। এ ক্ষেত্রে আমদানিকারকদের ব্যাংক ব্যালেন্স থাকার দরকার নেই। গতকাল ১৯ জুন সোমবার বাংলাদেশে ব্যাংক থেকে এ সংক্রান্ত একটি প্রজ্ঞাপন জারি করা হয়েছে। সূত্র-সংবাদ (পৃ.১,ক.৪), ইত্তেফাক (শেষ পৃ.,ক.৫), অবজারভার (পৃ.১,ক.২), এশিয়ান এজ (পৃ.১,ক.৭)।

৬। **মুক্তিযোদ্ধাদের জন্য তৈরি হবে ৮ হাজার ফ্ল্যাট : মুক্তিযুদ্ধ বিষয়ক মন্ত্রী**

মুক্তিযুদ্ধ বিষয়ক মন্ত্রী আ.ক.ম মোজাম্মেল হক সংসদকে জানান, সারাদেশের অসচ্ছল মুক্তিযোদ্ধাদের জন্য ৮ হাজার ফ্ল্যাট নির্মাণের একটি প্রকল্প গ্রহণ করা হয়েছে। মুক্তিযোদ্ধার সংখ্যানুপাতে প্রতি জেলা/উপজেলায় বহুতল ভবন নির্মাণ করা হবে। অপর এক প্রশ্নের জবাবে মন্ত্রী জানান, ‘প্রকৃত মুক্তিযোদ্ধা’ নির্ণয়ের জন্য ৪৭০টি যাচাই-বাছাই কমিটি করা হয়েছে। এসব কমিটি নির্দেশিকার আলোকে যাচাই-বাছাই করছে। তাদের প্রতিবেদন পাওয়া গেলে নামের গেজেট প্রকাশ এবং সনদ দেওয়া হবে। সূত্র-ইত্তেফাক (পৃ.১৫,ক.৫), জনকণ্ঠ (পৃ.৩,ক.৪), এশিয়ান এজ (পৃ.১,ক.১), ডেইলি সান (শেষ পৃ.,ক.৫)।

৭। **হালাল শিল্পের বিকাশ ঘটিয়ে বৈদেশিক মুদ্রা আয় সম্ভব : শিল্পমন্ত্রী**

অভ্যন্তরীণ চাহিদা পূরণের পাশাপাশি হালাল খাদ্য ও পর্যটন শিল্পের বিকাশ ঘটিয়ে বিপুল পরিমাণে বৈদেশিক মুদ্রা আয় করা সম্ভব বলে মন্তব্য করেছেন শিল্পমন্ত্রী আমির হোসেন আমু। তিনি বলেন, হালাল শিল্প বিশ্বব্যাপী একটি উদীয়মান শিল্পখাত। নিরাপদ ও স্বাস্থ্যসম্মত হওয়ায় জাতি-ধর্ম-বর্ণ নির্বিশেষে বিশ্বব্যাপী হালাল খাদ্য ক্রমেই জনপ্রিয় হয়ে উঠছে। মুসলিম সংখ্যাগরিষ্ঠ রাষ্ট্র হিসেবে বাংলাদেশ হালাল খাদ্য ও পর্যটন শিল্পের বিকাশ ঘটিয়ে বিশ্ববাজারে রপ্তানি বাড়াতে পারে। শিল্পমন্ত্রী গতকাল ১৯ জুন সোমবার ঢাকায় ‘বাংলাদেশ হালাল এক্সপো-২০১৭’এর সমাপনী অনুষ্ঠানে প্রধান অতিথির বক্তব্যে এ মন্তব্য করেন। সূত্র-সংবাদ (পৃ.১৪,ক.১), জনকণ্ঠ (পৃ.১৮,ক.৭), এশিয়ান এজ (পৃ.১১,ক.৫), ডেইলি সান (পৃ.২,ক.৫)।

৮। **নারী শ্রমিকের মজুরি নির্ধারণে চিন্তা-ভাবনা প্রয়োজন : কৃষিমন্ত্রী**

কৃষিমন্ত্রী মতিয়া চৌধুরী বলেছেন, বর্তমানে দেশে কৃষিকাজে নিয়োজিত নারী শ্রমিকের সংখ্যা শতকরা ৪৩ ভাগ। কৃষিতে নিয়োজিত এসব নারী শ্রমিকের মজুরি নির্ধারণ করা নেই। এ বিষয়ে চিন্তা-ভাবনা করা প্রয়োজন। গতকাল ১৯ জুন সোমবার সংসদ অধিবেশনে প্রশ্নোত্তর পর্বে এক প্রশ্নের জবাবে কৃষিমন্ত্রী এ কথা বলেন। সূত্র-সমকাল (পৃ.৫,ক.১), জনকণ্ঠ (পৃ.৩,ক.১)।

৯। **পাহাড় কাটার বিরুদ্ধে ব্যবস্থা নেওয়া হচ্ছে : সংসদে পরিবেশমন্ত্রী**

পরিবেশ ও বনমন্ত্রী আনোয়ার হোসেন মঞ্জু বলেছেন, পাহাড় কাটার বিরুদ্ধে দ্রুত ও জোরালো ব্যবস্থা গ্রহণের সিদ্ধান্ত হয়েছে। সে লক্ষ্যে নিয়মিত মামলা ও এনফোর্সমেন্ট কার্যক্রমের পাশাপাশি ভ্রাম্যমাণ আদালত পরিচালনা করা হয়েছে। গতকাল ১৯ জুন সোমবার জাতীয় সংসদ অধিবেশনে টেবিলে উত্থাপিত প্রশ্নোত্তর পর্বে তিনি এসব কথা বলেন। সূত্র-সমকাল (পৃ.২,ক.৫), ইনকিলাব (পৃ.৩,ক.৫)।

১০। **গত ৬ বছরে ৩১ লাখ বিদেশি বাংলাদেশ ভ্রমণ করেছেন : বিমান ও পর্যটনমন্ত্রী**

বেসামরিক বিমান পরিবহণ ও পর্যটনমন্ত্রী রাশেদ খান মেনন বলেছেন, বিদেশি পর্যটকদের আকৃষ্ট করতে বর্তমান সরকার বিভিন্ন পদক্ষেপ নিয়েছে। গত ৬ বছরে ৩১ লাখ ২২ হাজার ৭৫৬ পর্যটক বাংলাদেশ ভ্রমণ করেছেন। গতকাল ১৯ জুন সোমবার সংসদ অধিবেশনে প্রশ্নোত্তর পর্বে এক প্রশ্নের জবাবে এসব কথা বলেন মন্ত্রী। সূত্র-সমকাল (পৃ. ৫,ক.৫), জনকণ্ঠ (পৃ.৩,ক.৫), অবজারভার (পৃ.১৭,ক.১), ইন্ডিপেন্ডেন্ট (পৃ.৯,ক.২)।

১১। বিশিষ্ট কবি ও সাহিত্যিক বেগম সুফিয়া কামালের ১০৭তম জন্মদিন আজ

বাঙালি নারী আন্দোলনের অন্যতম অগ্রদূত, মানবতা ও গণতান্ত্রিক মূল্যবোধে সোচ্চার বেগম সুফিয়া কামালের ১০৭তম জন্মদিন আজ ২০ জুন। বাংলা ভাষার বিশিষ্ট কবি ও সাহিত্যিক ছিলেন তিনি। বহুগুণের কারণে বাংলার মানুষ তাকে ‘জননী সাহসিকা’ উপাধিতে ভূষিত করে। তাঁর জন্মদিন উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। দিনটি উপলক্ষে বিভিন্ন সংগঠন নানা অনুষ্ঠানের আয়োজন করেছে। সূত্র-সমকাল (পৃ.২,ক.১), ইত্তেফাক (শেষ পৃ.,ক.৫), ফিনানশিয়াল এক্সপ্রেস (পৃ.৩,ক.৭), অবজারভার (পৃ.৪,ক.৪)।

সম্পাদকীয়

- ক. **ইত্তেফাক** : চিকুনগুনিয়া রোগ প্রতিরোধে জনসচেতনতা তৈরির পাশাপাশি মশা নিধন কার্যক্রম অব্যাহত রাখার ওপর গুরুত্বারোপ।
- খ. **ভোরের কাগজ, নিউ এজ** : এক মাসের ব্যবধানে আবারো চিকিৎসকের প্রাইভেট প্র্যাকটিস বন্ধ রাখার মতো কর্মসূচি পালন করায় রোগীরা দুর্ভোগে পড়েছে উল্লেখ করে রোগীদের জিম্মি করে ধর্মঘট-কর্মবিরতি পালনের অমানবিক সংস্কৃতির অবসানে চিকিৎসক সমাজের শুভবোধ জাগ্রত হওয়ার পাশাপাশি সরকারেরও কঠোর অবস্থানে যাওয়া প্রয়োজন বলে মত প্রকাশ।
- গ. **জনকণ্ঠ** : জঙ্গি দমনে সরকারের নানা উদ্যোগের সফলতা কামনা।
- ঘ. **প্রথম আলো** : ভোলার লালমোহন উপজেলার তেঁতুলিয়া নদীর গজারিয়া খালগোড়া লঞ্চঘাটের আনুমানিক ৭৫ থেকে ৩০০ ফুটের মধ্যে দুটি খননযন্ত্র দিয়ে দীর্ঘ দিন ধরে অবৈধভাবে বালু তোলায় লঞ্চঘাট এলাকার নদী ভাঙ্গন তীব্র আকার ধারণ করেছে উল্লেখ করে এ ঘটনার জন্য দায়ীদের চিহ্নিত করে শাস্তিমূলক ব্যবস্থা নেওয়ার দাবি।
- ঙ. **সংবাদ, যুগান্তর, যায়যায়দিন, ডেইলি সান** : পাহাড় ধসের ঘটনায় আরও পাঁচ জনের মৃত্যুর খবর পাওয়ায় উদ্বেগ প্রকাশ করে পাহাড় ধসের মূল কারণগুলো উদঘাটন করে এ ব্যাপারে যথাযথ পদক্ষেপ নেওয়ার ওপর গুরুত্বারোপ।
- চ. **এশিয়ান এজ** : রাজধানীর ১৬ মিলিয়ন জনগণের জন্য বর্জ্য ফেলার স্থান অপরিষ্কার থাকায় উদ্বেগ প্রকাশ করে ঢাকায় সুপারিকল্লিত বর্জ্য ব্যবস্থাপনা গড়ে তোলার ওপর গুরুত্বারোপ।
- ছ. **ইন্ডিপেন্ডেন্ট** : ঢাকার জলাবদ্ধতা নিরসনে কার্যকর পদক্ষেপ নেওয়ার সুপারিশ।
- জ. **নিউ নেশন** : ঈদ উপলক্ষে কেনাকাটার সময়ে বাজারে জাল নোট বেড়ে যাওয়ায় উদ্বেগ প্রকাশ করে এ ব্যাপারে কঠোর ব্যবস্থা নেওয়ার দাবি জানিয়ে সম্পাদকীয় প্রকাশ।

উপ-সম্পাদকীয়

ইত্তেফাক পত্রিকায় প্রকাশিত কলামে, ব্যাংকিং সেক্টরকে সচল করার বৃহত্তর স্বার্থে রাষ্ট্রায়ত্ত্ব ও বিশেষায়িত ব্যাংকগুলোর ব্যবস্থাপনা পরিচালক এবং পরিচালনা পর্যদকে সরিয়ে দেওয়ার ক্ষমতা বাংলাদেশ ব্যাংকের ওপর ন্যস্ত করার প্রস্তাব।

নিবন্ধ ও ফিচার

সংবাদ পত্রিকায় প্রকাশিত ‘শিশুর সুস্থ বিকাশে মায়ের দুধের বিকল্প নেই’ শিরোনামের নিবন্ধে অভিমত প্রকাশ করা হয়েছে, ভবিষ্যৎ প্রজন্মকে সুস্থ ও সবল জাতি হিসেবে গড়ে তোলার লক্ষ্যে শিশুকে মাতৃদুগ্ধ পান করাতে উদ্বুদ্ধকরণ ও এব্যাপারে সচেতনতা সৃষ্টি করতে হবে।

#

ডালিয়া/শুকলা/সাদ্দা/রশীদ/তানিয়া/২০১৭/৯.০০ ঘণ্টা

